



5. November 2020

UKA 2020/111

Kalaallit qimmiat qimuttoq illersorniarlugu kalaallit qimmiannik qimmiutilinnut nerukkaatissarsiutaanut akileraartarnikkut ilangaammik pilersitsisinnaanerup pittaaqutai ajoqqutaalu pillugit Naalakkersuisut nalunaarusioqqullugit peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaq Doris J. Jensen, Siumut)

Siullermik Partii Naleqqamiit siunnersuuteqartoq qutsavigaarput, siunnersuummik uagut isumarput malillugu naatsukullammik torrallatamik saqqummiussimmat.

Partii Naleqqamiit isumaqarpugut Naalakkersuisut akissuteaatimikkut takutikkaat siunnersuutip siunertaanik paasinnissimanginnertik, imaqaluunniit paasinnerusunnginnertik. Tassami pineqartoq saneqqutiivillugu akissuteqarmata, siunnersuullu itigartillugu.

Siunnersuuteqartoq ilumoorluinnarpoq ullumikkut Nunatsinni qimmit qimuttut ikiligaluttuinnarput, tassa qimuttunik qimmiutilinnut atugassarititaasut imaannaanngimmata, qimminik paarsinissamut tunngasut, qimmeqarnermi peqqinnissakkut isumagisassat aammalu minnerunngitsumik qimuttunik qimmiuteqarnermi aningaasartuuterpassuit ilaannikkut qimuttunik qimmiutilinnut imaannaasanngitsut eqqarsaatigalugit.

Tamakku assigiinngitsut pissutigalugit Nunatsinni qimmit qimuttut ikiligaluttuinnarput, 1990-kkunni 35.000 missaanniissimagaluarput maannakkulli 15.000 ataassimalersimavaat.

Siunnersuuteqartoq ilumoorpoq aamma ilaatigut tunngaviuvoq silaannaap allanngoriartornera, snescooterinik unammillerneqarnek allarpassuarnillu minnerunngitsumik arlalinnik qimmeqarnerup akisuallaarnera. Kalaallit qimmiat qimuttoq ukiorpassuarni nunatsinni uumasuusoq illersussagutsigu immikkut iliuseqarnissaq avaqqunneqarsinnaanngilaq, taamaammat qanoq iliussissat ersarissut, aamma qimminik qimuttunik immikkut ilisimasaqalersimasut atorluarlugit ukiorpassuarni qimmeqarnermik ingerlatsisimasut atorluarlugit qanoq iliussissat pilersinneqartariqarput, qimmip qimuttup kalaallit qimmitta akoornearani qaqugorsuarmut piujuarnissaa anguniarlugu.

Siunnersuuteqartup saqqummiussaaticut takuneqarsinnaavoq 2016-imi Arctic Nomads Sisimiuni ingerlanneqarmat anguniagassat 22-t saqqummiunneqarsimasut, taakkunanilu ilaasoq anguniarneqassasoq qimmiutilinnut nerukkaatissarsiutaasimasut akileraartarnikkut ilanngaaticineqartalernissaat anguniarneqassasoq.

Naleqqamiillu isumaqarpugut tamatuma qimminik qimuttunik qimmiutilinnut tamanut atuutsinneqarnissaa qulakkeerneqartariqarpoq, imaangitsoq taamaallaat aalisarnermik piniarnermillu inuussutissarsiuteqartunut taamaallaat atuutsinneqassasoq.

Siunnersuutip qulequtaanut allannguutissamik Ataatsimiititaliaq siunnersuuteqartoqarsinnaammat siunnersuutip aappassaaneerneqannginnermini Aningaasaqarnermut Akileraartarnermullu ataatsimiititaliami suliarineqarnissaa innersuussutigaarput.

Pele Broberg, Partii Naleraq